



**ELAREN IRITZIA ESPAINIAKO GOBERNUBURUAK
DIPUTATUEN KONGRESUAN EGINDAKO AGERRALDIARI
BURUZ**

2012ko uztailaren 12a

0.- SARRERA

2012ko uztailearen 11n Mariano Rajoy Espainiako gobernuburua Diputatuen Kongresuan agertu zen berehalako neurri batzuren berri emateko; neurrion xedea, aurrekontuen doikuntza egin eta azken Europar Kontseiluan hartutako erabakiak betetzea.

Izatez gobernuak joan den maiatzaren 30eko Europar Kontseiluan erabakitako Gomendioak bere egin ditu. Gobernuak behin eta berriz kontrakoa esanagatik ere, neurriok hartzea eurotaldeak erabakitako baldintza bat da, Espainiak 100.000 milioi euroko mailegua jaso dezan (interesekin itzuli beharrekoa), gero bankuei emango zaien dirua.

Neurrien mamia funtzio publikoaren goitik beherako aldaketa da (administrazioen egiturari eragingo dieten neurriekin), aurrekontuetan gizarte-prestazioetan ondorioak izango dituzten erabakiak (langabezia, pentsioak, etab.), diru-sarrerei buruzko beste erabaki batzuk, zeharkako zergak gehitze aldera (BEZ eta zeharkako beste zergak), eta erreforma estrukturalen egutegia azkartzea.

I.- HERRI-ADMINISTRAZIOEN ERREFORMA

Udal desberdinetako alkate eta zinegotzien ordainsariak berdindu eta argitaratu egingo dira; udalaren ezaugarrien arabera baremoak ezarriko dituzte honetarako. Halaber, zinegotzi kopurua %30 inguru gutxituko da, eta tokiko enpresa publikoak ere murriztu egingo dituzte (erabat desagerraraztea ere aipatu da).

Gobernuak funtzio publikoa goitik behera aldatuko du. Rajoyren arabera, soldata eta ordainsariak dira aurrekontuetako atalik handienetakoa, eta horregatik orain arteko neurriez gainera (esaterako, lanaldia luzatzea edota langileen irteera medio sortzen diren hutsuneak ez osatzea, 2012ko Aurrekontuan erabakitakoak), beste batzuk hartuko dituzte. Aipatutako zenbait adibide (ziurrenik neurri gehiago etorriko dira):

- 2012an estatu-, autonomia- eta toki-administrazioetako langile eta goi-karguei bigarren aparteko paga ez ordaintzea; ez dute zehaztu 2013tik aurrera aparteko ordainsariekin zer gertatuko den.
- Erabilera libreko egun kopurua gutxitzea.
- Aldi baterako ezintasun egoerako baldintzak gainerako langileek dituztenekin berdintzea.
- Enplegatu publikoen mugikortasuna erraztea.
- Enpresa eta fundazio publikoen kopurua zeharo murriztea.
- Liberatu sindikalen kopurua legeak ezarritako mailara ekartzea.

II.- AURREKONTUETAKO NEURRIAK

a) Gastuei dagokienez

- Langabezia prestazioetan, prestazioa jasotzen hasten direnei seigarren hiletik aurrera kotizazio-oinarriaren %60a ordez %50a ordainduko zaie.
- Pentsioetan murrizketa gehiago izango dira: iraunkortasun-faktorearen aplikazioa

aurreratu nahi du gobernuak (ez du zehaztu erretiro adinaz, pentsioaren zenbatekoaz edo pentsioa kalkulatzeko aintzat hartzen den urte kopuruaz ari den...) eta erretiro aurreratuaren baldintzak aldatu.

- Menpekotasun sistemak eragindako gastua murriztu, horretarako baremoa eta prestazio ekonomikoak aldatuko direlarik.
- Enpleguari dagokionez, egun kontratatzeko ematen diren hobari gehienak kenduko dira.
- Gastuetan, berriz, 2012ko aurrekontuan beste murrizketa batzuk egingo dituzte ministerioen hainbat sailetan, 600 milioi euro inguru. Urtea amaiterako aurrekontu-kredituak murriztu egingo dira diru-laguntza, gastu arrunt eta transferentzietarako.
- 2013ko aurrekontuetan, aurtengo jaitsieraz gainera, beste %20 murriztuko dira alderdi politiko, sindikatu eta enpresario-elkarteentzako diru-laguntzak.

b) Diru-sarrerari dagozkien aurrekontu neurriak

Datorren ostiralean Ministroen Kontseiluak honako erabakiak hartuko ditu diru-sarreraren inguruan:

- BEZaren tasa orokorra hiru puntu gehituko du, egungo %18tik %21era. Tasa murriztua %8tik %10era igoko da, eta produkturik beharrezkoenen gaineko tasa supermurriztua bere horretan utziko dute, %4an.
- Gizarte-kotizazioak 2013an puntu bete jaitsiko dira, eta beste puntu bat gehiago 2014an.
- Tabakoaren gaineko zerga igo egingo da.
- Sozietateen Zerga zatika ordaintzeko modua aldatu egingo da.
- 2013tik aurrera erosle berriek ez dute etxebizitza-kenkaririk izango.

Oro har, diru-sarrerak eta gastu murrizketa aintzat hartuta, aurten hasi eta 2015eraino 65.000 milioi euro izango dira.

III.- ERREFORMA ESTRUKTURALAK

Epe laburrean besteak beste honako erreformak egingo dira:

- Energia-sektorearen erreforman beste fase bati ekingo zaio, zerga berriak ezarriko direlarik.
- Merkatuaren batasuna bermatzeko programa. Enpresen esparru arautzailean erreforma estrukturala egingo da. Herri-administrazioek emandako kreditazio eta ziurtagirien eraginak parekatu egingo dira.
- Zerbitzu-sektorea erreformatu eta liberalizatu egingo da. Banaketa komertzialean hasitako erreformez gainera ordutegiak malguagotu egin nahi dituzte. Halaber, trenbide, portu eta aireportu bidez egiten den garraioaren zerbitzuak liberalizatu egingo dira, eta zenbait kasutan, pribatizatu.

IV.- ONDORIOAK

Espainiar estatuan ezartzen ari diren murrizte-politikak herritarrei pobretze orokorra dakarkie, eta politika hori datozen egun eta asteetan areagotuko egingo da. Politika honekin atzeraldia areagotzen ari dira, langabezia gehitzen, gizarte-babesa murrizten eta gero eta jende gehiagok hil amaierara iristeko zailtasunak izatea eragiten dute. BEZa gehitzea eta murrizketak egitea (prestazio sozialetan nahiz arlo publikoko soldatetan) politika bidegabeak dira; krisia beraren ardurarik ez dutenei ordainarazten diete.

Politika honen oinarria manipulazioa eta gezurra da. Herritarrei erabaki antisozial hauek ezartzeko moduarekin demokrazia hondatzen da, benetako informaziorik eta eztabaida sozialik ez baitago; bitartean, bankuetara dirutza publikoa bideratzen da. ELArentzat ezin da onartu bankuei 100.000 milioi euro ematea eta garai berean langabezia-prestazioak, pentsioak eta soldatak moztea. Ez da onargarria ere enpresei gizarte-kotizazioak jaistea eta herritarrei BEZa igotzea. Begibistakoa da errenta kopuru izugarria biztanleriaren gehiengoari kendu eta gutxiengo baten poltsikora bideratzen ari dela. Harrapaketa honek, gainera, botere politiko, ekonomiko eta finantzarioaren babesa du.

Espainiar estatuan gertatzen denak Grezia, Portugal edo Irlandaren antza gero eta handiagoa du. Betiere, estatu horietan ezartzen ari diren politiken ondorioak ezin okerragoak dira. Onuradunak badira, ordea: soldatak eta gizarte-babesa murrizteekin edo zerbitzu publikoak pribatizatzearekin aberasten direnak. Agintariek azaldu egin beharko lukete zergatik ari diren gutxiengo boteretsu batentzat lanean.

Europa eraikitzeke eredu antisoziala da, eta kutsu hau areagotzen ari da; ELAk hau arbuiatu egiten du. Salatu beharra dago norabide horretan joateko akordio politiko bat egin dutela. Horren adierazgarri, Europar Batasuneko azken Ituna nola berretsi zen, joan den ekainaren 21ean espainiar Kongresuan: aldeko botoa eman zuten PPK, PSOE, EAJk eta CiUk. Halako eztabaida garrantzitsuak izan duen oihartzun txikia ere nabarmentzekoa da.

Haatik, alternatiba badago, eta hau krisiarentzako irtenbide justua litzateke: murrizketarik ez aplikatzea eta zerga- zein gizarte-politikak errotik aldatzea. Politika horrek logika neoliberal eta kapitalistari aurre egitea eskatzen du, baita botere ekonomiko eta finantzarioari ere.

ELAk Hego Euskal Herriko instituzio guztiei eskatzen die espainiar Gobernuak aurkeztu dituen murrizketa berriak ez aplikatzeko.

Politikak aldatzeko bide bakarra daukagu: salaketa eta mobilizazioa.